

**Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq.**

## **pillugu**

### **Sanaartornermut Ataatsimiititaliap**

#### **Siunnersuutip aappassaaneerpeqarneranut**

#### **ISUMALIUTISSIISSUTAA**

Sanaartornermut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqtigiit, Siulittaasoq  
Inatsisartunut ilaasortaq Siverth K. Heilmann, Atassut, siulittaasup tullia  
Inatsisartunut ilaasortaq Harald Bianco, Inuit Ataqtigiit  
Inatsisartunut ilaasortaq Anders Olsen, Siumut  
Inatsisartunut ilaasortaq Jens Kristian Therkelsen, Siumut

UKA 2022-imi ulloq 13. Oktober siullermeerinninnerup kingorna ataatsimiititaliap siunnersuut misissorpaa.

#### **Siunnersuutip imarisaa siunertaalu**

Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqarnissaanut pitsaaqutissai ajoqutissaalu, taamatuttaarlu assartuinnermut unammilleqatigiinnerup eqqunneqarnissaanik Naalakkersuisut sukumiisumik misissuinissaannik peqquneqassasut aalajangiiffigisassatut siunnersuummi siunertarineqarpoq.

**Siunnersuutip Inatsisartunit siullermeerneqarnera**

Siunnersuut ataatsimut isigalugu taperseerqarpoq. Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqarnissaa assartuinernullu unammilleqatigiinnerup eqqunneqarnissaa tamatumalu saniatigut nunaqarfinnut pilersuineranut pitsaanngitsumik kingunneqarnissaa ernumassutigineqarpoq.

Siullermeerinninnermut Naalakkersuisut allannguutissatut siunnersuut tulliuuttut saqqummiuppaat:

*”Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuineranut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnerisut. Misissuineq Inatsisartunut UPA 2024 nallertinnagu tunniunneqassaaq”.*

Naleraq tulliuuttutut allannguutissatut siunnersuuteqarpoq:

*”Inatsisartut aalajangiiffigisassaattut siunnersuut, Naalakkersuisut peqquneqassasut Royal Arctic Line A/S sullissinissamik akuersissutaata 1. Januar 2025 atorunnaarsinneqassasoq, nutaamik taarsiunneqarluni Kalaallit Nunaata Danmark akornani assartuinissamut kisermaassilluni ingerlatsivilernissaanut, Kalaallit Nunaata iluani kisermaassisariaqarnani assartuussisinnaasoqartinnagulu pisussaaffilissallugu. Peqqusinerup kingunerissavaa unammilleqatigiinneq ammarneqassasoq nunanit allanit, namminersortunngorsaanermillu kajumissaarinneqataassalluni, pilersuisussaataanerlu qulakkeeqqassallugu”.*

**Siunnersuutip aningaasatigut kingunerisassai**

Misissuinissap suliarineranut atorfiluup ukiumut suliarisartagaasa 500.000 kr.-niniq naleqartussatut nalilerneqarpoq. Ataatsimiititaliaq tassunga oqaaseqaatissaqanngilaq.

**Ataatsimiititaliap siunnersuummik suliarinninnera**

Tulliuuttuni allannguutissatut siunnersuutit marluk ataatsimiititaliamit isummerfigineqassapput. Naalakkersuisut allannguutissatut siunnersuutaanni Inatsisartunut tunniussinissaq sivitsorlugu UPA 2024-mut killiliunneqassasoq siunnersuutigineqaqqaartumit kisimi allaassutaavoq.


Naleraq allannguutissatut siunnersuutaata malitsigissavaa, Royal Arctic Line kisermaassilluni ingerlatsivilernissaanut Naalakkersuisut peqquneqassasut taamaammallu siunnersuutaqqaartumiit annertuumik allaanerussuteqarpoq. Taamaammat allannguutissatut


siunnersuut imarisaanut allannguinnginnissamik piunasaqaammik eqquutsitsinngitsutut ataatsimiititaliamit nalilerneqarpoq.

**Ataatsimiititaliap inassutai**


- Ataatsimiititaliap isumaqatigiittup Naleqqap allannguutissatut siunnersuutaata itigartinneqarnissaa inassutigaa
- Ataatsimiititaliap isumaqatigiittup Naalakkersuisut allannguutissatut siunnersuutaata akuerineqarnissaa inassutigaa


Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.

  
Kristian Jeremiassen  
Siulittaasoq

  
Siverth K Heilmann  
Siulittaasup tullia

  
Harald Bianco

  
Anders Olsen

  
Jens Kristian Therkelsen